

摘藻堂四庫全書薈要

史部

欽定四庫全書叢要

史部

欽定大清通禮卷

二十七至  
三十二

詳校官編修臣繆晉



欽定四庫全書薈要卷八千三百五十七

欽定大清通禮卷二十七

嘉禮

冊封親王世子郡王之禮

命下禮工二部製親王及世子

冊寶以金郡王

冊印銀質金飾

若嗣封王注名於冊寶印世相傳授

豫期禮部諏吉奏

請

命內大臣散秩大臣一人為使內閣學士翰林院學士  
禮部侍郎一人副之屆日鴻臚寺官設案於

太和殿丹陛正中東西肆王府官備鼓吹一部於長  
安門外鑾儀衛設采亭於禮部堂上儀制司官陳

節

冊寶印於亭內校尉舁亭由東長安門入至

太和殿階下亭止奉

節升階陳於案封使及執事官朝服竝於丹墀禮部侍

郎升東階就節案左立封使升東階詣案前北面  
西上侍郎舉

節西面授正使正使持

節偕副使降階鑾儀校舁采亭從導以御仗出

太和中門至長安門外封使及執事官咸乘馬鼓吹  
前導詣王邸第

右遣封使

是日府屬官豫設節案於府堂內正中前設香案

左設冊寶案皆東西肆設樂於儀門內設儀仗於  
庭中繡花曲蓋一銷金繖二繡花繖二繡花扇二  
皆紅色孔雀扇二青色立瓜卧瓜骨朵吾仗各四  
纛四旗十大刀二豹尾槍二明輿一乘馬六世子減繡  
花繖二立瓜卧瓜骨朵吾仗纛旗豹尾槍各二加  
紅繖一郡王復減紅繖一大刀二餘均與親王同  
東西分列封使及府門下馬正使持

節前行府屬引贊引王朝服迎於大門外道右跪候過  
興隨入樂止副使奉

制冊禮部官奉寶印隨

節升自中階陳

節於堂內中案陳

冊寶印於左案就立案東宣冊官禮部官立封使後均  
西面引贊引王升西階就堂內北面立樂作贊行  
三跪九叩禮興樂止進至香案前跪禮部官詣冊  
案展

制冊宣冊官西面宣讀訖以

制冊授正使正使授王王祇受轉授從官從官跪接興  
復於案宣讀官宣寶印副使授王如受

冊儀封使皆復位立王退至拜位樂作行禮如初禮畢  
樂止王出大門外道右立正使奉

節出副使及執事官從至門外王跪送

節候過興退封使回還

節有司皆退

右封親王世子郡王

冊封長子貝勒貝子之禮

命下工部製

制冊以紙為之中書科中書繕文訖送禮部既有日禮部奏

請

命內閣侍讀學士侍讀翰林院侍讀學士侍講學士侍  
讀侍講一人為使禮部郎中員外郎主事一人副  
之屆日鴻臚寺官設案於

太和殿階下正中禮部儀制司官奉

節

冊於采亭鑾儀校舁行入至

殿階下陳

節於案陳采亭於案左封使及執事官入俟丹墀禮部

侍郎就節案左立封使詣案前北面侍郎舉

節西面授正使正使持

節鑾儀校舁亭導以御仗副使及執事官從出

太和中門至長安門外乘馬詣府第如諸王之儀是

日府屬官設樂於儀門內設儀仗於庭中銷金繖  
二繡花扇二立爪卧爪骨朶吾仗各二燾一旗六  
明輿一乘馬六

貝子減銷金繖  
一卧爪馬餘同

東西分列長子貝

勒貝子迎

節冊受

冊送

節均如諸王之儀

右封長子貝勒貝子

冊封公主之禮

命下工部製

冊以金鐫字送禮部禮部諏吉奏請

命使持

節往封如親王之儀

右遣封使

是日府屬官豫設節案於公主府堂內正中前設香案左設冊案皆東西肆設樂於儀門內設儀仗

於庭中曲蓋一紅寶花繖二孔雀扇二青花扇二

立瓜卧瓜骨朶吾仗各二纛二車一乘

和碩公主減青花扇

餘同東西分列封使及府門下馬正使持

節入采亭從公主禮服率侍女迎於儀門內道右跪候

過興副使奉

冊隨

節升自中階以

節

冊陳於堂內各案就案東立宣冊官禮部官立封使後  
均西面侍女引公主由西階升詣堂中北面立樂  
作行六肅三跪三拜禮興樂止進至香案前跪禮  
部官詣冊案展

制冊宣冊官西面宣讀訖以

制冊授副使副使西面授內監內監跪接授侍女侍女  
跪授公主公主祇受仍授侍女接以興復於案公  
主興退就拜位樂作行禮如初禮畢樂止侍女引

退正使奉

節出副使及執事官從公主跪送

節於儀門內如初迎禮封使回還

節有司皆退

右封公主

冊封福晉夫人之禮間五歲禮部彙疏請封所司製

冊親王福晉世子福晉金冊郡王福晉銀質金飾貝勒貝子夫人紙冊送禮部禮部奏請

命使視親王郡王貝勒貝子是日鴻臚寺官設案於

太和殿階下禮部官奉

節

冊

冊視  
彙封人為數

於采亭鑾儀校舁行入至

殿階下陳

節於案陳亭於案左各府屬官備鼓吹於長安門外封  
使及執事官朝服入竢丹墀禮部侍郎率屬立節  
案左封使詣案前禮部官奉各

節授正使鑾儀校舁亭副使及執事官從出

太和中門至長安門外乘馬鼓吹前導詣各府第各  
府設樂於門內設儀仗於庭中曲蓋一紅寶花繖  
二孔雀扇二青寶花扇二立瓜卧瓜骨朶吾仗燾  
各二車一乘世子福晉減寶花扇郡王福晉復減  
曲蓋卧瓜貝勒夫人復減寶花繖一  
骨朶燾餘與親王福晉  
同貝子夫人不設儀仗東西分列迎

節冊受

冊送

節均如諸公主之儀

右封福晉夫人

凡封郡主縣主郡君之禮間五歲由部彙請遣使  
往封均用紙冊郡主儀仗視郡王福晉縣主郡君  
視貝勒貝子夫人餘儀同前

右封郡主縣主郡君

欽定大清通禮卷二十七

欽定四庫全書薈要卷八千三百五十八

欽定大清通禮卷二十八

嘉禮

頒詔之禮是日禮部官設案於堂上設香亭龍亭於

午門外樂部和聲署陳樂於香亭南內務府官設金  
鳳朶雲於

天安門樓雉口正中工部官設臺於樓內東楹之南  
鴻臚寺設案於臺上南北肆宣詔鴻臚寺官四人

立臺下鳴贊二人立金鳳左右八旗領催五城耆  
老集外金水橋前東西祇候

皇帝受賀禮畢還宮禮部儀制司官以雲盤承

詔書恭奉出

太和中門導以繖仗官屬前引尚書侍郎從百官隨  
出至

午門外設於龍亭行一跪三叩禮興校尉舁行導引

如初導迎樂作

登極頌詔  
樂陳而不作

奏禧平之章辭曰

申命重巽綸下九閤勾出萌達百昌咸振象魏懸  
韶鐸巡德意宣天地春至

天安門鴻臚寺官引百官出豫往金水橋南東西按  
班序立領催耆老別為班隨後立皆北面龍亭由  
東道升樓設於正中南向奉詔官進跪叩如初恭  
奉

詔書登臺恭設案上退立臺東禮部官移龍亭下樓陳  
於門外鳴贊贊有

制衆皆跪宣詔官登臺西面展

詔書先宣滿文後漢文畢復於案退贊跪叩興百官及  
領催耆老三跪九叩興鴻臚寺官引退奉詔官奉  
詔書置朶雲內綵繩懸繫自金鳳口中啣下禮部官接  
受仍設於龍亭跪叩校尉昇行導引如初由

大清門詣禮部陳於堂中尚書侍郎率屬行三跪九  
叩禮恭鐫謄黃

頒行天下

右宣詔書

詔下直省之禮禮部按直省督撫駐劄之地行取閣部  
院寺筆帖式乘傳齎

詔前往頒布工部給龍旗繖仗前導所經府州縣五里  
之內文武官朝服跪迎軍民伏道右候過省會有  
司豫於公廨設屏南向屏前設

詔案又前設香案案東設臺階下為文武官拜位文東

武西重行異等如朝賀儀

詳見三  
大節

紳士班於文官

之末耆老軍民集於武官之末皆北面宣詔官一人展詔官二人立臺下西面通贊者立香案左右引禮生立百官班位左右皆東西面

詔及郊守土官備龍亭旗仗出迎使者承

詔書以架奉陳龍亭內乘馬後隨鼓樂前導總督暨同城文武大僚率所屬文武官朝服出迎道右跪候過興先至公解門外序立紳士耆老軍民畢會

詔至門跪迎如初禮使者下馬從龍亭入衆隨入使者

奉

詔書陳於案退立案東西面引禮生引羣官就位北面  
立通贊贊跪叩興衆行三跪九叩禮贊宣

詔使者奉

詔授宣詔官復位立宣詔官跪接登臺展詔官二人從  
升均西面展

詔書宣讀訖復於案皆降衆聽贊復行三跪九叩禮如  
初退使者以

詔授督撫恭鏐謄黃頒學政鹽政織造管關兩司道府  
轉頒所屬州縣衛將軍提鎮協將轉頒所屬營汛  
至日宣布軍民均與省會儀同

右頒詔直省

詔下朝鮮國之禮禮部豫列內大臣侍衛禮部滿侍郎  
內閣滿學士銜名奏請

命正副使各一人啟程有日使者赴禮部領

詔書工部給御仗旗纛使者乘傳以行至朝鮮國境其

國守土吏治館傳所經地文武官跪接候過如直  
省之儀將及國王遣其重臣出郊迎接

詔書前期於國門外治館舍供張備龍亭香亭儀仗鼓  
樂祇候於館設屏於王殿上正中前列

詔案香案設國王拜位於殿階上設衆官拜位於庭內  
東西重行異等皆北面宣讀官一人立

詔案之東展詔官二人立宣讀官南均西面司禮二人  
位國王拜位之北皆東西面使者既及國迎接官

迎

詔書至館恭設龍亭內馳報國王王率其國陪臣朝服  
郊迎迎接官以龍亭行香亭儀仗鼓樂前導使者  
乘馬從國王以下咸跪候過輿隨行入國門至殿  
內使者於殿門外下馬從入龍亭設於殿中使者  
立於龍亭東西面儀仗陳於階下樂懸陳於門內  
引禮引國王升階就拜位北面引班引衆官均就  
拜位北面立司禮贊跪王率衆官皆跪贊叩興樂

作國王以下行三跪九叩禮興樂止使者進於龍  
亭奉

詔書授宣詔官復位宣詔官跪受詣開讀案展詔官進  
立左右展

詔宣詔官西面宣讀訖跪授使者復於龍亭執事者退  
使者復位立司禮贊叩興國王率陪臣行三跪九  
叩禮如初使者奉

詔書授國王國王跪受付所司頒行使者與國王揖讓

行禮辭出國王拜送於大門外適館國王詣館饗  
燕致饗餼如禮及歸拜送於國門外使歸至京以  
事竣復

命於朝

右朝鮮國迎接詔書

欽定大清通禮卷二十八

欽定四庫全書薈要卷八千三百五十九

欽定大清通禮卷二十九

嘉禮

頒朔之禮欽天監豫推來歲時憲書成式二月恭進

御覽乃鐫於版四月驛送直省各布政司依式刊造均  
以歲十月朔日頒行是日鴻臚寺欽天監官設案  
於

午門外正中左右各一均東西肆又設二案於甬道

左右均南北肆工部官設香亭一龍亭一於欽天  
監堂中設采亭八於左右樂部和聲署陳樂於香  
亭前黎明欽天監監正率屬朝服陳恭進

皇帝

皇太后

皇后時憲書於龍亭陳王公百官時憲書於采亭鑾儀  
校以次昇行香亭在前次龍亭次采亭鼓吹前導  
導迎樂作奏禧平之章辭曰欽若誠亶皇正朔頒

分秒無忒玉衡齊貫敬授時宜暑寒禱事明民庶  
歡由東長安門入至

午門外亭止恭奉

皇帝

皇后前時憲書陳於正中左案恭奉

皇太后前時憲書陳於右案奉王公百官時憲書陳於東  
西案欽天監官四人對舉左右案二人前引入

午門中門監正監副從至

太和門陳於左右階上監正等於丹墀左行三跪九叩禮內務府掌儀司官奉時憲書至

乾清門

慈寧門恭進

皇帝

皇太后

皇后欽天監官徹案出

右獻朔

其日王貝勒以下文武百官朝服畢會

午門外東西闕下鴻臚寺鳴贊二人進立於甬道左  
右糾儀御史二人禮部司官二人進立於鳴贊之  
北皆東西面宣制鴻臚寺官一人立糾儀官之北  
西面鳴贊贊齊班鴻臚寺引親王郡王貝勒貝子  
公按翼序立於甬道內引文武百官序立於甬道  
左右皆北面東班西上西班東上贊進皆進贊跪  
皆跪贊宣

制宣制官宣

制曰某年時憲書頒給衆官曉諭天下宣畢贊叩興衆  
行三跪九叩禮興退禮部欽天監乃頒朔於王公  
百官親王郡王貝勒貝子公以下八旗暨部院府  
寺監長貳各官皆以次跪領所屬官次日赴欽天  
監祇領遂頒布於郊甸

右京師百官受朔

歲屆頒朔之日各省會總督若巡撫率在城文官

將軍率在城武官受朔是日首縣於督撫署內向  
闕列屏設案布政使以所刊時憲書設於龍亭鼓吹  
前導舁詣公署恭陳於案質明文武官朝服畢會  
通贊贊齊班引禮二人引各官文東武西重行異  
等以品為序咸就拜位北面立如朝賀之儀特跪  
叩興衆行三跪九叩禮興以次祇受時憲書畢各  
退布政使分發專城之道轉行所屬州縣衛分駐  
之提鎮協轉行所屬標營到日行禮祇領與省會

同遂頒布於民間

右直省受朔

每歲十月朝鮮國王遣其陪臣齋咨赴禮部受來  
歲之朔禮部豫取欽天監時憲書函封鈐印訖頒  
朔翼日設案於儀制司堂上正中會同四譯館大  
使引朝鮮國陪臣服本國公服入儀制司郎中公  
服就案坐吏奉時憲書置於案贊禮者一人立於  
案右贊進大使引陪臣詣案前贊跪陪臣跪贊受

朔吏奉時憲書授陪臣陪臣恭受興退乃歸報朝  
鮮國王王朝服祇受如禮遂頒布於其國人

右朝鮮國受朔

歲立春前日順天府府尹率所屬迎春東郊如禮

詳見  
直省

製春山按欽天監所推春圖飾土牛及勾芒

神春山一案芒神執策立土牛左合設一案各三

案送禮部恭獻

皇帝

# 皇太后

皇后禮部豫取學弟子員七十有五人天文生八人於立春前一時自部分昇案依次由東長安門至

午門外祇候禮部尚書侍郎率其屬順天府府尹具進春表章及丞率其屬咸朝服畢會欽天監官報時屈入自中門執事者舉四案從

昭德門至

後左門外禮部官屬前引尚書侍郎及府尹從內監

接昇入詣

乾清門前引官止立階下府尹於門外跪進表章內  
監啟門舉各案入恭進

皇帝

皇后前又奉二案從

熙和門詣

永康左門外前引後從如儀內監接昇入以獻

皇太后前各官出皆退

# 右進春

立省迎春之禮先立春日各府州縣於東郊造芒  
神土牛春在十二月朔後芒神執策當牛肩在正  
月朔後當牛腹在正月朔後當牛膝示民農事早  
晚屆立春日吏設案於芒神春牛前陳香燭果酒  
之屬案前布拜席通贊執事者於席左右立府州  
縣正官率在城文官丞史以下朝服畢詣東郊立  
春時至通贊贊行禮正官一人在前餘官以序列

行就拜位贊跪叩興衆行一跪三叩禮執事者舉  
壺爵跪於正官之左正官受爵酌酒酌酒三授爵  
於執事者復行三叩禮衆隨行禮興乃昇芒屨土  
牛鼓樂前導各官後從迎入城置於公所各退

右直省迎春

欽定大清通禮卷二十九

欽定四庫全書薈要卷八十三百六十

欽定大清通禮卷三十

嘉禮

歲仲春吉亥

皇帝躬耕

帝耜之禮前期禮部疏請得

旨徧布諸司供備

詔親王郡王三人六部都察院通政司大理寺卿貳九

人從耕順天府備

躬耕絲鞭耒耜飾以黃服耜黃犢稻種青箱備從耕三  
王麥穀九卿豆黍青箱鞭及耒耜朱飾服耜黝牛  
皆依期畢辦

右戒辦

先一日遣官祇告

奉先殿是日黎明順天府官豫設案二於

太和殿東檐下以龍亭三分載

躬耕鞭耒種箱采亭四分載麥穀豆黍種箱鑾儀衛備  
曲蓋御仗樂部和聲署設鼓吹均蒞於

午門外府尹率屬奉耕器入陳於第一案鞭左耒右  
奉種箱陳於第二案稻種中肆麥穀左豆黍右

皇帝御中和殿閱

先農壇祝版畢

儀詳  
吉禮

記注官退蒞丹墀

皇帝暫

御保和殿戶部尚書侍郎率屬舉案入

太和殿南左門出

殿北左門詣

中和殿內正中陳鞭耒案於北陳種箱案於南皆東西肆遂及禮部尚書侍郎序立丹陛之南重行西面禮部尚書奏請

御中和殿記注官升西階復位立

皇帝御殿

閱耕器五穀種畢奏禮成

皇帝出殿門乘輿還宮扈從如儀戶部官舉案復於  
太和殿東檐下順天府官升左階徹案奉鞭耒種箱  
出

午門外仍設各亭內鑾儀校舁行前列繖仗導迎樂  
作奏禧平之章辭曰辰作農正鸞輅勸耕種稔嘉  
種降康延慶帝藉開農政行我稼同明賜成出

大清門

正陽門由

先農壇東門詣耜田耕所

右閱耒耜穀種

是日工部官灑掃

觀耕臺上下耜以椶薦張次於具服殿之東設

御屏

寶座於臺上正中南向武備院官供

御座鋪陳順天府官陳

御鞭種箱龍亭於耜田之左陳耒耜龍亭於耜田之右

陳麥穀豆黍種箱采亭於從耕耤田左右陳耕器  
農器於臺下東西兩旁如儀

右陳設

乃辨位耤田之北正中為

皇帝躬耕位戶部尚書一人在右順天府府尹一人在  
左禮部尚書一人太常寺卿一人鑾儀衛使一人  
在前耆老二人農夫二人掌耕犢鴻臚寺序班表  
左右從耕田首東班王二人戶部兵部工部通政

司各一人西上西班牙一人吏部禮部刑部都察院大理寺各一人東上皆順天府官屬丞倅二人從耆老一人農夫二人掌耕牛樂部典樂一人和聲署正二人丞二人立於耤田南北面立歌禾詞者十有四人司金司鼓司板司篴司笙司簫各六人頂帶耆老四人披蓑戴笠執錢鏹者二十人麾五色采旗者五十人耆老三十有四人農夫三十人相間為班魚貫東西序立署正一人立於北東

面鴻臚寺鳴贊一人立於東西西一人立於西東  
面侍儀御史二人分立鳴贊官之北東西面記注  
官四人立臺南階下之西東面不從耕王公大學  
士及三品以上官夾臺東西隅翼立陪位

右序位

鑾輿出官

儀詳  
十禮

屆日

皇帝親饗

先農

儀詳  
吉禮

禮畢前引內大臣贊引對引太常寺卿恭導

皇帝詣具服殿更衣黃龍袍少俟鑾儀衛官率輿尉迴輿

於

觀耕臺東階外從耕三王九卿墜陪位王公以下咸

蟒袍補服詣耕藉所按班東西祇候執事官依位

序立禮部尚書太常寺卿奏時遂及前引大臣十

人恭導

皇帝出殿南向詣耕藉位和聲署正舉旗三麾歌工樂

工以下齊赴耤田北前引大臣退於兩旁侍立從  
耕三王九卿就耕位東西面立鳴贊贊進耒耜戶  
部尚書奉耒耜贊進鞭順天府府尹奉鞭均北面  
跪進興退

皇帝右秉耒左執鞭禮部尚書太常寺卿鑾儀衛使恭  
導行

躬耕禮耆老牽牛農夫扶犁順天府府尹執青箱戶部  
尚書隨播種左右鳴金鼓采旗招颺工歌三十六

禾詞唱和從行辭曰光華日月開青陽房星辰正  
呈農祥帝念民依重耕桑肇新千藉考典章吉蠲  
元辰時日良蒼龍鑾輅臨天閭青壇峙立西南方  
犧牲簠簋升芬芳皇心祇敬天容莊黃幕致禮虔  
誠將禮成移蹕天田旁土膏沃洽春洋洋黛犁行  
地牛服韁司農種秬盛青箱洪縻在手絲鞭揚率  
先稼穡為民倡三推一墾制有常五推九推數遞  
詳王公卿尹咸贊襄甸人千耦列鴈行耰鋤既畢

恩澤滂自天集福多豐穰來牟蕎薺森紫芒華鄉  
赤甲秬稭秠秠三種黎白黃稷粟堅好碩且香  
糜芑大穗盈尺長五菽五豆充隴場粳粱糜黍九  
色糧蜀秫玉黍兼東唐烏禾同收除童梁雙岐合  
穎遍理疆千箱萬斛收神倉四時順序百穀昌八  
區九有富蓋藏歡騰億兆感聖皇

皇帝三推三返

每歲奉  
加一推一返

音

畢歌止順天府府尹以

青箱復於龍亭鳴贊贊受耒戶部尚書跪受耒耜

贊受鞭順天府府尹跪受鞭皆興復置各龍亭內

皇帝御補服禮部尚書奏請

御觀耕臺暨太常寺卿恭導

皇帝升中階

御寶座後扈內大臣隨升立

御座兩旁記注官升西階東西北上序立從耕三王九

卿以次受鞭耒耜耆耋牽牛農夫扶犁順天府屬丞

倅一人執青箱一人隨播種三王五推五返九卿

九推九返畢釋鞭耒入侍班位立執事官以青箱復各采亭內序班引順天府官屬及耆老農夫服本色服持農器至臺前西偏北而東上重行序立聽贊行三跪九叩禮退至耤田終畝

右親耕

禮部尚書奏禮成

皇帝降東階乘輿由

先農門出

法駕鹵簿前導導迎樂作奏祐平之章辭曰翩彼桑扈  
仁氣布和千畝親御百祥膺荷保介歆穰穡多帝  
手推民樂歌

皇帝回鑾王公從各官以次退不陪祀王公百官朝服  
集

午門外跪迎

午門鳴鐘王公隨

駕入至內金水橋恭候

皇帝還宮各退

右鑾輿回宮

若逢

時巡省方

盛典遣官祭

先農壇

儀詳  
吉禮

禮畢是日順天府府尹率屬耕藉九推九

返農夫終畝畢望

闕行三跪九叩禮儀與直省同

奉天府直省府州縣各於東郊

先農壇側擇沃壤為耤田歲仲春吉亥有事

先農之日省會總督若巡撫率在城文官耕耤是日首  
縣知縣視土宜備穀種青箱朱鞭耒服耜黝牛及  
他農器耕器豫陳耕所耆老率農夫披袞戴笠  
於田間通贊學弟子員分立田首又向

闕張畫屏設香案一南向通贊立香案之南引班教  
諭訓導立通贊之南皆東西而致祭

先農辰

儀詳吉禮

禮畢各官易蟒袍詣耤田通贊贊行耕耤禮

督撫以下就耕所執事者授耒耜與鞭皆右秉耒

左執鞭進耕督撫以府佐貳官一人執種箱一人

播種布政使按察使以首領官執箱播種各道以

州縣佐貳官執箱播種知府知縣以丞史執箱播

種皆耆老一人牽牛農夫二人扶犁各九推九返

畢釋鞭耒以次序立田首西西北上農夫遂終畝

告畢事各官補服望

闕立通贊贊齊班引班分引督撫以下至香案前按  
班序立重行北面耆老農夫稍遠列行北西隨立  
贊跪叩興行三跪九叩禮興各退

若府不附省州縣衛不附府者正官率佐貳丞史  
耕耤各以耆老二人執箱播種餘儀與省會同  
右直省府州縣耕耤

欽定大清通禮卷三十

欽定四庫全書薈要卷八千三百六十一

欽定大清通禮卷三十一

嘉禮

歲季春

皇后躬桑之禮前期三月禮部具疏奏  
聞

皇帝承奉

皇太后懿旨下

制報可乃徧布諸司供備內務府豫奏以

妃

嬪二人公主親王福晉以下縣君鎮國公夫人以上  
三人文三品武二品官以上命婦四人從蠶採桑  
掌儀司治桑畦飭採桑鉤筐

皇后金鉤

妃

嬪銀鉤均黃筐福晉夫人命婦均鐵鉤朱筐依期畢

辦

右戒辦

皇后既以吉已饗

先蠶

儀詳吉禮

禮畢蠶已生翼日

如蠶未生則視蠶生翼日

皇后散齋一日從採桑

妃

嬪福晉夫人命婦畢齋宮殿監侍設案於

交泰殿內正中東西肆又設案於左右南北肆率內

監至

內右門祇候是日執事官咸蟒袍補服黎明內務府  
官以龍亭一載

躬桑筐鉤采亭一載從採桑筐鉤內鑾儀校舁行掌儀  
司官前導總管暨蠶宮令從由

隆宗門至

內右門外亭止宮殿監督領侍率蠶宮令暨內監恭  
奉筐鉤以次入

內右門陳

皇后筐鉤於

交泰殿中案陳

妃

嬪福晉夫人筐鉤於左案陳命婦筐鉤於右案皆筐  
左鉤右畢乃奏時屆

皇后吉服出

御交泰殿

妃

嬪隨出侍立

皇后先閱鈎次閱筐既徧還宮

妃

嬪從入宮殿監侍奉筐鈎仍置各亭內以次昇行出  
內右門授蠶宮令鑾儀校接昇前引如初至內務府  
署旗仗前導導迎樂作奏禧平之章辭曰戴勝告  
時西陵肇典爰舉懿筐爰臨柘館御鞠衣登瑞蘭

金鉤陳嘉義展及西苑奉宸苑卿自門迎入祫饗宮  
令分陳於採桑所

右閱筐鉤

屆日蠶宮令率內監潔埽具服殿內外及

觀桑臺上下藉以稷薦設

皇后觀桑寶座於臺北正中南向供

御座鋪陳臺下桑畦東西首行第一株為

皇后躬桑位東向執鉤相儀一人在右執筐相儀一人

在左東西第二行一株為

妃

嬪從採位第三行一株為福晉夫人從採位第四行  
一株為命婦從採位執鈎筐蠶母各二人皆在左  
右傳贊女官二人在臺南左右北面侍班福晉夫  
人命婦在女官之南東西面內侍率童監歌採桑  
詞者十人司金鼓板篳篥簫者二十有四人於臺  
前東西麾五色采旗者四十人於桑畦外東西分

班序列

右序位

是日黎明蠶宮令啟西苑門從桑侍班福晉夫人  
命婦及執事女官蠶母蠶婦咸蟒袍補服豫至西  
苑南門內序立祇候辰正二刻禮部尚書內務府  
總管詣

乾清門告時巳初刻宮殿監侍轉奏

皇后御龍袍乘輿出宮從桑

妃

嬪蟒袍乘輿從詣西苑如饗

先祝蠱儀

右車駕出宮

皇后駕至西苑詣具服殿少俟傳贊分引

妃

嬪福晉夫人命婦就從採位立引侍班之福晉夫人  
命婦就侍班位立執事女官監童監咸依位序立

典儀奏請

皇后行躬桑禮

皇后出具服殿前引後從如常儀至桑畦北正中相儀  
女官一人奉鉤跪進於右一人奉筐跪進於左興  
皇后右持鉤左持筐東行桑畦外采旗招颺臺前內監  
鳴金鼓歌採桑辭曰躬耕禮成詔躬桑蠶月吉已  
迎辰祥金華紫闕五翟光瑞雲彩映椒塗黃壇南  
宿戒帷宮張西陵展事搖珩璜齋肅恭敬柔雍彰

金鉤綠遽懿宮筐尚功司製奉以將柔條在東涵  
露香鞠衣三摘鳴鳩翔月靈臨賁龍精昌黼黻五  
色質且良昭事上帝祠蒸嘗儀刑宇宙帥妃嬙衣  
食滋殖被萬方

皇后至東第一株桑前東向採桑一條蠶母二人助採  
復行至西第一株桑前東向採桑二條天蠶母助採  
亦如之採畢歌止各退

皇后以鈎筐授相儀相儀二人跪授於左右興復於龍

亭退埃臺隅典儀奏請

御觀桑臺贊引對引命婦恭導

皇后陞臺御座

妃

嬪以下採桑各蠶婦一人授鉤一人授筐二人助採  
妃

嬪福晉夫人採桑五條命婦採桑九條畢咸釋鉤筐  
授蠶婦復於采亭

妃

嬪登臺侍立

皇后寶座前左右福晉夫人命婦退入侍班位立執鉤  
筐者皆退典儀相儀各女官歛諸筐次第置於臺  
南傳贊引<sub>祝蠱</sub>母<sub>祝蠱</sub>婦至臺前北西跪典儀舉

皇后懿筐授<sub>祝蠱</sub>母<sub>祝蠱</sub>母恭受次舉

妃

嬪以下從桑各筐授<sub>祝蠱</sub>婦<sub>祝蠱</sub>婦受訖皆興奉筐至<sub>祝蠱</sub>

室切之祝蟲婦灑箔禮成

右親桑

祝蟲母以禮成告典儀典儀跪奏

皇后駕興贊引對引恭導

皇后詣具服殿典儀奏陞座

皇后陞寶座傳贊分引

妃

嬪以下東西序立次福晉次夫人次命婦次祝蟲母祝蟲

婦東位西上西位東上皆北面傳贊贊跪叩興皆  
行六肅三跪三拜禮興退典儀奏禮畢

皇后降座陞輿警蹕

妃

嬪從還宮如來儀福晉以下皆退

右禮成回宮

及蠶成蠶母蠶婦擇繭貯筐以獻

皇后

皇后獻於

皇帝

皇太后乃擇吉日

皇后行繅三盆手禮採桑

妃

嬪從繅是日乘輿出宮警蹕如常至織室繅盆前  
妃

嬪侍立蠶母漬繭於盆以手出緒握其總跪進

皇后

皇后受總親繅三少退立

妃

嬪進繅以五為節遂布於絜婦之吉者使繅禮畢乘  
輿還宮警蹕如來儀

右獻繭繅絲

欽定大清通禮卷三十一

欽定四庫全書薈要卷八千三百六十二

欽定大清通禮卷三十二

嘉禮

恭進

實錄

聖訓之禮監修總裁官撰表章豫諏進呈吉日奏

聞禮部轉飭諸司供備前期內閣擬

制辭及慶賀致辭

皆隨時撰擬

恭呈

欽定付鴻臚寺屆期陳

法駕鹵簿樂懸於

太和殿前如常儀禮部鴻臚寺官設書案於

保和殿內正中設表案於門外之左均東西肆工部  
官陳香亭龍亭表亭於

實錄館鑾儀衛備黃蓋龍旗御仗樂部備尊迎樂如儀監  
修總裁提調纂修各官祇候館內王公按翼祇候  
內金水橋北文武百官祇候橋南均朝服舉案侍

衛祇候

保和殿外內監祇候

乾清門外均蟒袍補服質明監修官奉表於亭纂修  
各官恭奉

實錄

聖訓設龍亭內訖行三跪九叩禮興校尉舁行繖仗前導  
導迎樂作奏禧平之章辭曰昭示無垓謨烈聿皇  
垂布方策日星輝朗配典墳揚耿光永繹思綏萬

邦進

協和門香亭龍亭循中道入

太和中門王公百官跪候過興表亭循道左入

太和左門監修總裁以下官隨入以次陳亭於

殿階下監修官恭奉表文纂修官詣亭跪三叩興恭

奉

實錄

聖訓亭徹鴻臚寺卿二人引奉書官升中階由

太和殿中門入詣

保和殿陳於中案監修官奉表文升左階由

太和殿左門入詣

保和殿陳於門外東案及總裁提調各官於丹陛東北面行三跪九叩禮興咸西面序立王公由

太和左右門文武百官由

昭德門

貞度門入序立如常朝儀禮部尚書侍郎奏請

御殿遂前導

駕

皇帝禮服乘輿出宮後扈大臣侍衛從至

保和殿後階降輿入

御殿侍衛布拜褥於書案前禮部尚書侍郎恭導  
皇帝就拜位北向敬受

實錄

聖訓行三跪九叩禮興退立案東西向侍衛進舉書案及

表案由

殿北門詣

乾清門內監恭接送入

大內監修總裁以下各官出詣

太和殿丹墀入百官班內序立

右臨軒受書

禮部尚書侍郎奏受書禮成恭導

皇帝御中和殿侍班執事官行禮如儀畢乃

御太和殿前引後扈

午門鳴鐘鼓作樂鳴鞭均如常朝儀鴻臚寺卿二人  
立東檐下記注官侍班執事官各依常位立鳴贊  
贊齊班王公百官咸就拜位立贊進皆進贊跪皆  
跪鴻臚寺卿一人進至

殿中檻外北面跪代奏臣工慶賀致辭畢興又一人  
出自丹陛前西面宣

制答致辭畢皆退復位贊叩興丹陛大樂作王公百官

行三跪九叩禮畢

皇帝還宮鳴鞭作樂扈從如儀王公百官皆退翼日

賜監修總裁以下各官燕於禮部如儀

詳筵燕儀

右臨軒受賀

恭進

實錄

聖訓禮畢監修官別繕

皇史宬

盛京藏本及內閣副本各一部既告竣禮部譟吉奏  
聞分送尊藏恭送

皇史宬之禮屆吉日所司設香亭龍亭黃蓋龍旗御  
仗鼓樂於館如前儀黎明監修總裁率提調纂修  
各官朝服詣館恭奉

實錄

聖訓陳於龍亭訖行三跪九叩禮如儀校尉昇行繖仗前

導導迎樂作

樂章樂  
辭見前

出

東華門各官隨行詣

皇史宬亭止恭奉

實錄

聖訓入於金匱各官行禮如初禮畢皆退是日纂修官以

副本送內閣尊藏

右送皇史宬尊藏

恭送

盛京之禮先期禮部轉飭諸司供備

欽命禮工二部尚書或侍郎各一人率其屬一人在館  
提調官一人纂修官二人欽天監官一人護送工  
部備車馬於朝陽門外按

實錄

聖訓函數製行箱備香亭龍亭鑾儀衛備黃蓋龍旗御仗  
樂部備導迎樂屆期均祇候於館監修總裁官率  
提調纂修恭奉

實錄

聖訓於行箱陳於龍亭豫設館內正中護送官朝服詣館

行三跪九叩禮畢校尉舁行轎仗前導導迎樂作

樂章樂  
辭見前

護送官從出朝陽門外樂止載以車馬進

發所經地守土文官治道路橋梁駐宿次舍武弁  
率士卒前後防護皆朝服跪迎道右送亦如之至  
盛京城外將軍五部侍郎府尹丞咸率其屬朝服出  
郊跪迎備香亭龍亭鼓樂奉迎以入恭設於

崇政殿內各官按品列行序立行三跪九叩禮欽天

監官豫諏尊藏吉日屆期恭昇龍亭詣

翔鳳樓前提調纂修偕五部司官恭奉

實錄

聖訓登樓尊藏於金匱既畢各官行禮如初皆退

右送盛京尊藏

玉牒告成恭進

御覽監修諸王大臣豫諏進呈吉日奏

聞禮部轉飭諸司供備屆期禮部鴻臚寺官設案於

中和殿內正中均東西肆又設案於左右兩旁均南  
北肆工部官備龍亭采亭於宗人府

玉牒館龍亭正肆南向采亭左右肆東西相向鑾儀衛  
備黃蓋龍旗御仗樂部備導迎樂如儀總裁王大  
學士尚書率提調纂修各官朝服祇候館內質明  
宗人府官奉

玉牒分陳於龍亭采亭訖總裁以下各官詣龍亭前行  
三跪九叩禮興校尉舁行龍亭在前采亭在後總

裁以下乘馬從繖仗前導導迎樂作奏禧平之章  
辭曰瓜瓞滋長椒實衍昌公姓千億福壽維嚮定  
角仁朱芾皇錫類洪咸樂康由

大清中門入至

天安門外各官下馬從至

午門外王下馬從至

太和殿階下纂修官恭奉

玉牒以次升階詣

中和殿分置各案訖王於階前大學士以下各官於  
丹陛南均北面序立行三跪九叩禮興進詣中案  
恭展

玉牒退至

殿外侍立禮部尚書侍郎奏請

御殿遂前導

駕

皇帝禮服乘輿出宮

御中和殿立於案左西向禮部尚書奏視

玉牒恭導

皇帝詣正中北面視中案所展

玉牒畢

皇帝還宮導從如儀總裁率提調纂修官奉

玉牒詣

乾清門授內監接入

右臨軒親受

禮部官移龍亭采亭於

乾清門外所司設黃蓋龍旗御仗於

太和殿階下設導迎樂於

東華門外恭候

御覽畢內監奉

玉牒出提調纂修官接奉分設龍亭采亭內校尉昇行

出

保和殿

中和殿

太和殿繖仗前導由

太和門

協和門

東華中門出導迎樂作

樂章樂辭見前

諸王大臣纂修各官

從詣

皇史宬敬奉尊藏畢各退翼日

賜監修各官燕於禮部

詳筵燕儀

右送皇史宬尊藏

玉牒告竣總裁官別繕

盛京藏本禮部誦吉奏

聞遣總裁王大臣一人提調官一人纂修官二人禮部  
工部大臣司官各一人欽天監官一人自宗人府  
恭送

盛京尊藏於

敬典

崇謨二閣與恭送

實錄

聖訓儀同

右送盛京尊藏

欽定大清通禮卷三十二



總校官庶吉士 臣 張能照

校對官庶吉士 臣 翟槐

謄錄監生 臣 李華文

謄錄舉人 臣 陳紹貴

欽定四庫全書叢要

史部

欽定大清通禮卷三十

六三至

詳校官編修臣繆晉



欽定四庫全書薈要卷八千三百六十三

欽定大清通禮卷三十三

嘉禮

皇帝經筵之禮歲春秋仲月

皇帝將舉

經筵禮部承

旨諏吉奏

開豫期翰林院奏定滿漢講官各二人直講經書掌院

學士暨直講官擬篇目撰講章豫進

御覽

欽定翰林院恭繕以竣

右戒辦

屆期祇告

傳心殿

先聖

先師

皇帝親詣於前一日遣官於屆日黎明將事如儀

詳見吉禮

右祇告

是日五鼓所司潔掃

文華殿內外武備院官供

御座鋪陳禮部鴻臚寺官設

皇帝書案於

御座前南向設講案於

殿內正中北向黎明翰林院官恭奉

御覽講章陳於

皇帝書案書左經右奉進講副本陳於講案書設案左  
經設案右畢退

右陳設

辨班位講官滿八人位

殿內東柱之南西面漢八人位西柱之南記注官在  
柱西均東面侍班內閣大學士吏部戶部禮部尚  
書侍郎通政司使副使詹事府詹事少詹事位滿

講官之後東班西面兵部刑部工部尚書侍郎都  
察院左都御史副都御史大理寺卿少卿位漢講  
官之後西班東面

若衍聖公來朝  
居東班之首

侍儀東班給事

中二人西班監察御史二人位於班末鴻臚寺卿  
二人鳴贊二人位東西檐下皆東西面北上丹墀  
立位以品為序東西面迎

駕南上送

駕北上拜位序品亦如之東位西上西位東上重行北

面

右序位

大昕講官侍班侍儀暨執事官吉服集

文華殿丹墀內按班序立禮部侍郎二人詣

乾清門奏時遂前導

駕

皇帝常服乘輿出宮扈衛如常儀由

後左門出左翼門詣

文華殿丹陛上降輿

御寶座後扈內大臣立

御座旁左右導

駕禮部侍郎於門外左右侍衛於階下左右立記注官

升西階入

殿右門就位鳴贊官升東西階就位立贊齊班講官  
侍班糾儀各官就丹墀拜位立贊跪叩興行二跪  
六叩禮興鴻臚寺卿一人引滿講官升東階北由

殿左門闌右入侍班官升階南由闌左入一人引漢講官升西階北由

殿右門闌左入侍班官升階南由闌右入左右糾儀官隨入咸依位序立鴻臚寺卿退就檐下立鳴贊贊進講滿漢直講官出班詣講案前跪三叩興退復位滿直講官一人出東班南行數武西趨及中門左棖前折旋北面就案左展書宣講畢却退折旋東趨復位漢直講官一人出西班東趨逾中闌

及左棖前折旋北面就案左講書畢却退折旋西趨復位

皇帝闡發書義講官暨侍班官跪聆畢興又滿直講官一人出班西趨逾中闌就案右漢直講官一人出班東趨就案右先後講經畢却退復位

皇帝闡發經義各官跪聆亦如之鴻臚寺卿引由左右門出降階就丹墀拜位北面序立內監設坐氍毹於殿內東西二行各官聽贊行禮如初

右進講

鴻臚寺卿復引各官升東西階進

殿內按品分行序立

皇帝賜羣臣坐皆一叩列坐

賜茶如儀

詳朝賀儀

仍引出降階至丹墀東西序立禮部侍

郎奏禮成恭導

皇帝陞輿還宮扈衛如來儀翰林院官奉講章正本授  
內監各官咸退是日燕在位各官於

協和門

詳延  
燕儀

右禮成還宮

欽定大清通禮卷三十三

欽定四庫全書薈要卷八千三百六十四

欽定大清通禮卷三十四

嘉禮

皇帝臨雍之禮

命下禮部諏吉具疏以

聞徧布諸司供備豫期行取衍聖公五經博士孔氏裔

俊秀五人東野氏孔氏顏氏曾氏孟氏仲氏閔氏

冉氏言氏卜氏顓孫氏端木氏有氏裔各二人乘

傳赴京及各氏子孫見列朝官者直省在京之進士舉人貢監生各學教習肄業諸生咸詣太學觀禮國子監祭酒司業擬經書篇目撰講章豫進

御覽

欽定恭繕以竣

右諏日戒辨

屆期五鼓國子監祭酒率屬灑掃學宮內外工部

司官張

御幄設

寶座於彝倫堂正中南向武備院官供

御座鋪陳鴻臚寺官於幄前稍左設經案東西肆左右  
各設講案均南北肆未明祭酒奉

御覽講章陳幄左案書左經右奉進講副本陳書於左  
案陳經於右案退

右陳設

辨堂內外班位講官滿漢祭酒二人位堂內左案

西面滿漢司業二人位右案東西記注官位西柱  
下東西侍班王公位講官後大學士九卿詹事位  
王公後糾儀給事中御史位班末聽講羣官暨諸  
生位東西階下執事舉經案國子官二人位堂左  
右門內鴻臚寺鳴贊二人立東西檐下宣制官一  
人立東鳴贊官之右序班二人立於階上又序班  
四人分立庭內左右皆東西面北上辨庭中拜位  
東班衍聖公祭酒西班司業率國子官各學教習

五經博士進士舉人聖裔賢裔

如凡列朝官則以品序

貢監

生東位西上西位東上皆重行北面

右辨位

鑾輿出宮

儀詳吉禮

皇帝詣

大成殿釋奠

先師

詳吉禮釋奠儀

禮畢出大成門就大次更補服少俟王公

以下咸更補服王公於大次之南祇候大學士偕

朝官衍聖公率五經博士聖裔賢裔先詣彛倫堂  
庭內東西祇候祭酒司業率所屬及各學教習進  
士舉人諸生於太學門內階下東西序立祇候禮  
部尚書奏請

皇帝詣彛倫堂行講學禮太學鳴鐘鼓

皇帝出大次至廟門外乘輿前引後扈如常儀禮部尚  
書侍郎恭導入太學中門王公隨入祭酒以下跪  
候過輿均隨入

皇帝陞堂降輿

御寶座禮部尚書侍郎前引內大臣止立門外侍衛夾  
兩階翼立後扈內大臣於

御座兩旁侍立王公立階上左右記注官升西階入右  
門就位執事官咸就位鳴贊贊齊班序班分引衍  
聖公祭酒司業以下至庭東西拜位北面立贊進  
衆進贊跪叩興行三跪九叩禮興退復位

皇帝賜王公大臣坐鴻臚寺官引王公由左右門入序

班引衍聖公大學士九卿詹事升東西階隨入咸  
按班就位一叩坐翰詹四品以下官國子官六堂  
各學師儒五經博士各氏後裔進士舉人肄業諸  
生進就東西階下園堂外聽講鳴贊贊進講滿漢  
祭酒二人升東階入自左門司業二人升西階入  
自右門均北面立贊舉案國子官進舉經案恭設  
御前

皇帝賜講官坐祭酒司業各就東西講案一叩坐祭酒

以次講書義司業以次講經義講畢贊舉案國子  
官舉經案復幄東出王公大臣起立聽講官退復  
位祭酒司業出降階復庭中東西拜位國子官各  
學教習進士舉人諸生從就拜位北而立

右講書

禮部尚書進奏傳

制鳴贊贊有

制祭酒以下皆跪宣制官進至中門左宣

制曰聖人之道如日中天講究服膺用資治理爾諸師  
生其勉之宣畢退鳴贊贊叩興祭酒以下行三跪九  
叩禮興以次先詣成賢街道右序立祇候

皇帝賜王公大臣茶如儀

詳見朝儀

畢仍引自左右門出降

階東西序立祇候禮部尚書奏禮成

皇帝降座乘輿扈衛如來儀由太學門出祭酒以下咸  
跪送候

駕過興退

法駕鹵簿前導導迎樂作奏禧平之章辭曰崇聖尊道  
乾德下交思樂多士化流芹藻鼓篋徵經術昭聽  
講環宏育陶

皇帝還宮

儀詳  
吉禮

右禮成回鑾

臨雍禮成衍聖公率五經博士各氏後裔祭酒司業率  
屬暨各學教習進士舉人貢監肄業諸生各具表  
送禮部翼日五鼓鴻臚寺官豫設表案於

太和殿內之左南北肆禮部儀制司官奉表陳於案  
樂部率和聲署入展樂懸鑾儀衛率官校入陳

法駕鹵簿均依常次記注官侍班執事各官王公文武  
百官立位拜位如三大節朝賀儀辨丹墀內謝

恩班位衍聖公祭酒在東司業在西國子官各學教習  
五經博士進士舉人各氏後裔貢監生以次從東  
西班後立位東西西北上拜位北面東班西上西  
班東上與太學行禮同漏未盡王公百官朝服畢

會如常儀五經博士暨諸生各以其職公服隨會  
午門外闕下質明鴻臚寺序班以次引入執事官咸  
入就位禮部尚書侍郎奏請

御殿

午門鳴鐘鼓

皇帝禮服乘輿出宮

御太和殿作樂鳴鞭並如常儀丹陛樂作鴻臚寺序班  
分引謝

恩各官就丹墀東西拜位北面立鳴贊贊進皆進贊跪  
皆跪樂暫止贊進表宣表官入

殿左門就案奉衍聖公表文出至檐下正中北面跪  
大學士二人左右跪展表宣表官宣畢興仍奉進

復於案

祭酒表設而不宣

退樂作謝

恩各官聽贊行三跪九叩禮興引退復位樂止  
賜王公大臣衍聖公祭酒司業茶畢鳴鞭作樂

皇帝還宮

禮均與朝儀同

禮部官以表送內閣王公百官皆退

是日

賜衍聖公等燕於禮部

詳筵燕儀

右表謝

皇帝東巡狩詣

闕里講書於詩禮堂前期禮部具奏

命行在大臣會衍聖公選聖裔賢裔二人充經書直講  
翰林院官擬篇目撰講章豫進

御覽

欽定恭繕以俟

右戒辦

屆期工部官張

御幄設

寶座於詩禮堂正中南向武備院官供

御座鋪陳鴻臚寺官於

御幄前設經書案案堂東設勅案均東西肆設講案於西

檐下南北肆是日黎明內閣中書奉

勅陳堂內東案翰林院官奉

御覽講章陳於幄前中案奉進講副本陳於講案皆書  
左經右畢退

右陳設

辨班位記法官立堂內西柱下東面大學士一人  
立東檐下宣勅官一人立大學士後皆西面鴻臚  
寺卿二人鳴贊二人立東西階上東西面序班二  
人立於庭西執事官一人立序班之下均東面

右序位

鑾輿出行宮

儀詳吉禮

皇帝詣

大成殿釋奠

先師

詳吉禮里釋奠儀

闕

禮畢出同文門至奎文閣前就大次

少埃扈從大學士以下京堂科道以上守土官巡

撫司道於承聖門左以次序立衍聖公率東野氏

孔氏顏氏曾氏孟氏仲氏閔氏冉氏言氏卜氏顓

孫氏端木氏有氏五經博士及直講官於門右以  
次序立禮部尚書奏請

皇帝詣詩禮堂行講學禮

皇帝出大次乘輿前引後扈如常儀至承聖門外各官  
跪迎候過輿隨入門內左右序立如初司道官候  
於門外

皇帝至詩禮堂前降輿

御寶座禮部尚書侍郎前引內大臣止立門外侍衛夾

東西階下翼立後扈內大臣於

御座兩旁侍立記注官升西階入右門就位大學士升  
東階立東檐下執事官咸入就位鳴贊贊齊班序  
班引衍聖公以下就庭西拜位北而立贊跪叩興  
行三跪九叩禮興贊講書直講一人出班升西階  
詣講案前跪三叩興就案西東面講四子書畢降  
階復位次直講一人出班升階講經如講書之儀  
右進講

鴻臚寺卿進至中門之左奏宣

勅鳴贊贊跪衍聖公以下皆跪大學士入左門就案奉  
勅出堂中門授宣勅官奉至階前西面宣

勅曰至聖之道與日月並行與天地同運萬世帝王咸  
所師法下逮公卿士庶罔不率由爾等遠承聖澤世  
守家傳務期型仁講義履中蹈和存忠恕以立心敦  
孝弟以修行斯須弗去以奉先訓以稱朕懷爾等其  
祇遵母替宣畢奉

勅降中階左西面授衍聖公衍聖公恭受執事官趨進  
跪奉以興退贊叩興衍聖公率博士以下謝

恩行三跪九叩禮興豫往毓粹門外祇候各官咸出禮  
部尚書奏禮成

皇帝降座尊從如來儀至毓粹門就大次更衣常服出祇  
謁

孔林

儀詳  
吉禮

禮畢

還行宮各退

右禮成還行宮

欽定大清通禮卷三十四